

Rajshahi Re Santali Horop Beohar Reak' Ja_rur_teak' Babotre Seminer

Sokolbar (19 April) a.yup' bela Santali pa_rsi ra_khi jogao ar santali horop beohar ja_rur. babot mit' seminer do hoyena. Adivasi Mukti Morcha kendrio komit_i koak' bondoboste Rajshahi Bibhagio Khudro Cultural Academy re noa seminer do hoyena. Ona seminer-e a.yurkeda Adivasi Mukti Morcha komit_i ren sabha mukhia. Jogendronath Soren.

Seminer re Maran' per_a lekate set_ere tahe~kana Caritas Bangladesh Rajshahi t_ot_haren a_k'yuric' Devid Hembrom. Bises per_a lekate set_ere tahe~kana Rajshahi Bibhagio Khudro Cultural Academy ren gobesona officer Benjamin Tudu, Adivasi Mukti Morcha kendrio komit_i ren sadharon sompadok Bhadu Baskey, Food Inspector Mukul Tudu ar Godagari Upajila Pargana Babulal Murmu. Ina_chad_a ho~ set_er ko tahe~kana Adivasi et_ak' et_ak' a.yurko. Manotan per_a ko menkeda, Ale do santal kanale. Aleak' gogo pa_rsi ar horop do Santali. Santali pa_rsi ar horop porcar, sarsadle, beohar ar ra_khi jogaore joto santal ko aodhaonok', gor_o gopor_o ar Santali pa_rsi ar horop babotre joto lekan ka_mihorare seledok' reak' as ko dohokeda. Latarre thor_a mot kathako ol car_haoena.

1. Santal koak' Santali Roman akhor ma_n'jur babot aodhan tahe~nok' Prathomik ar Gonosikha Montronaloy re.
2. Prathomik ar Gonosikha Montronaloy ren Montri sa~o bahal (protinidhi) dol n'apamko talate Santali pa_rsi (Roman) babotre gapalmarao.
3. Joto hor_ak' mot lekate pa_rsi reak' horop ko nend_ae la_git' Montri ar MP ko batlao ko hoyok'a.
4. Upajila, Jila ar Bibhag porjaire santal budankoante gapalmarao hoyok'a.
5. Online reak' ka_mihorako jia_r. dohoe hoyok'a.
6. Santali horop reak' puthi, khobor kagoc, nathipotro jogao dohokak'.

7. Santali horop nend,ae la.git' mit't,en Santali group Maran' montri sa~o n'apam ja.rur,a.
8. Sarkarak' non'jorre jemon par,aok' ona la.git' michil, gapalmarao sabha reak' bondobos.
9. DC ar Bibhagio Commissioner sa~o n'apamkate nathipotro ko saman' hoyok'a.

ADAM AR HAWA

Isor do purua, sec' Edenre mit't,an'e bagwanket'a. Ona bagwan do Paradesko n'utum akat'a. Isor ond,e do ot khon a,d,i lekanak' mon'j n'elok' darekoe janam ocoket'a ar tala bagwanre do jion reak' dare ar boge ba,r,ic' bad,ae ok'rom darege. Ar Isor do Eden bagwanre manwae dohokedea ona joton ar horhoe la.git', are metadea, Bagwan reak' joto dare reak' do kha,tirjomam jomgea; menkhan boge ba,r,ic' bad,ae ok'rom dare reak' jo do alogem joma; ente ona reak'em jomle hilok' kha,t,igem gujuk'a.

Isore menket'a, Manwa eskar taken do ban' bogea mit't,en gok'r,oic' in' benaoea uni leka. Khange Isor do joto janwar manwa t,hene a,guket'koa n'el la.git', cele celeye n'utumkoa mente, ar manwae n'utumket'ko leka mimit' mimit' janwar reak' n'utum hoyentakoa; menkhan manwa la.git' gok'r,oic' do bae n'amlena uni leka do, Khange Isor do manwa acete ja,pit' ocokedea ar uniak' mit' pan'jar od,okkate onaren mit't,a,n' maejiue benaokedea, ar manwa t,hene a,gukedeadea. Khange manwae menket'a. Nuk'u~i nit' enec' in' jan' reak' jan' ar in' jel reak' jelge; uni do herel rinic'e n'umugok'a; ente herel reak' khone hatao od,okena. Ona ia,te herel hor, do ac'ren en'gat' apat ba,gia,kinte ac' rinic' t,hene jamar, akan tahena, ar mit' jelkin hoyok'a.

Uni manwa reak' n'utum do Adam (metak'me Pilcu har.am) ar maejiu reak' n'utum do Hawa (metak'me Pilcu bud.hi). Sonotkin tahe~kante gha.t.guna. Duk da.ndi, harkhet saset, rua.haso, gujuk' gurok', cet'ge bakin bad.ae kan tahe~kana.

Lolo Seton' Karonte Sikhna.t T.ha~onako Arho~ 7 Din Bond Reak' Da.bi

Mit' lagaote Roja ar Eid-UL-Fitr reak' 26 din chut.i muca.t're At.hwar hilok' (21 April) khon disom reak' joto Sikhna.t T.ha~onako jhijok' la.gidok' kana. Menkhan nia.ko dinre a.d.i lolo seton' din calak' kana. Nonkan dosare Sikhna.t T.ha~onako reak' chut.i arho~ eyae (7) din d.her la.git'ko da.bi akada Obibhabok Oiko Forum.

Sokol hilok' (19 April) songothon ren sabha mukhia. Birbant.a Md.Ziaul Kabir Dulu ak' suhiat' mit' d.harwa.k're noa da.bi reak' kathako sodor akana. Arho~ men akana, nonkan lolo seton're ja~ha~ lekan ja.r.ur. begor hor.ko ho~ bahre od.okok'ko manayet'koa prosason. Ente nit Sikhna.t T.ha~onako jhic'lenre gidra.ko do aema lekan rua.hasoreko ja.bun dar.eak'a. Onate disom reak' joto Sikhna.t T.ha~onako 7 din bond dohoe la.git'ko da.bi akada.

TARKO

Hur-r-r ha~t. ha~t.. Hur-r-r ha~t. ha~t.. Cekate ba.kin tar.am tar.am dar.eak' kanaya! Hur-r-r ha~t. ha~t.. Cet' lekam seren'et' kanaya. Serma seton' rokor. dhiri, lolo kan do dula.r. lolo kan do? Ber ge

t.hik leka bae rakap' akana-lolo ede kana! Ar noa Ca.t.a.i Ba.rin redo okare rokor. dhiri dom n'amkedaya? Buru disom reak' seren' do cedak' nond.e dom seren'eda! Thor.a gan ho~ bae etom koye~ dar.eak'a! Nonka seren'me-Ca.t.a.i Ba.rin rokor. d.ahar, tarko kan do dada tarko kan do. Ei, ei n'elkedam, n'elkedam? Bar baren' manaet' me kana, hina. nia. do alom seren'a, ma nit do sambr.aome. Cet' cekayena! Nit ho~ bam an'jomeda? Hu~m-ro-ro-ro, ne~ baber sab me. Ma lutur kir.bit' kate hud.in' har.ambawak' seren' aten me, seren' te cet'e menet' kana?

Dhutiye nam ba.bum da.r.hiena,

Tala kulhirem ten'goyena.

Hor do disa.i me ber do koyog me,

Sa.n'gin' disom na~iha.r tinrem tiyog?

Sor ar sa.n'gin' ren manotan gon'ke ko, noa "Tarko" akhr.a khon jotoko dula.r. johar selet' manot joharin' bad.ae ocoyet'bon kana. Asok' ka.na.n' joto koge Isorak' sa.ha.ite napaege menak'bona. He~, a.d.i din khonge mit' bar kathako mon ontor re hed.ec' hed.ec' te dak' rimil leakage upca.o rakap'ente-ape ko t.hen in' t.helao pasnaoet' kana. Pasec' co pasec' okoyak' mon khon con' noa ko katha reak' joto, har.hat' ar her.em sebel katha do rod.oc' od.okok'te, aboak' dha.rti tund.a.n' re mit't.en bhage a.yuric' lekae ka.mie. Ona do babon men dar.eak'a karon; dak' nu~t, mon nu~ tar rimil nu~t-noa ko nu~t redo ban'ma cet'ge ban' n'el n'amok'a. Ona rege gaynaha Ho~e seren' leda:

Rimil nu~te nu~t keda, ti reak' baj munda.m hosor n'uren.

Landa sa.ga.i ban' hale, landa katen' koyeya, baho~n' harin' bhalae halan'keda.

Bapre bap! a.d.i khid khida.uk' ba.hu kur.i kan geaeya. Hosor n'uren munda.m baho~n' hartet' bae halan' lekan je at' kok' tae, ona re mon duk ban' kate, landa kate koye ge maran' do hoyena! Jotoge ereltet' kor.a ko hoelen khan ja.nic' arho~ bhage hoe kok'a, base! Un umer re noa seren' do mand.wa latar reak' don' seren' moneak' kan tahe~a. Menkhan thor.a din laha har.ambawak' noa seren' do, ceka co mon reak'

arhantar re lur.ga.u tiyok' keda jia.l hako leka mon do hurla./tarko rakap' ente ar ban' sambr.ao dar.eada. Ja.rur.te noa seren' reak' jahan phen se ga.hri katha do menak'a. Oka do in'ak' pa.ila. bohok' re bae cape rakap' oco dar.eak' kan. Har.ambawak' noa seren'te aboawak' jin'gi khemao re cet'e batlao se oka seak' hore uduk' abon kana?

Dha.rti t.und.a.n' babot, hor.mo-haraburu, orthonoitik (economic) se dhorom reak' lahanti babote cek'hao kana, se cet'e menet' kana? Ma tobe do nenkage. A.d.i ga.khur. gar.owan don' ban' kana, onate thor.a don' tarko ocobongea. Ar ho~ nonkage oka hilok' con'...! In'ak' din ha.bic' ra.khi jogao, suluk, nira.i ar jagwar selet' Isor t.hen koejon re jamar. akan bon taken ma, jemon bid.a.u re alobon nu~ruk'. Muca.t're arho~ joto ko tahe~kana "Tarko" akhr.a khon aema aema dula.r. ar manot johar.

Pherao

Ban'gladisom mit't.en ka.t.ic' disom kana. Gota t.and.ige ha.r.ia.rte perec' akana. Noa ka.t.ic' disomre aema hor menak'koa. Ar aema ka.t.ic' ja.tigust.i ho~ ko tahe~nok'kana. Ar onko mod khon a.d.i kom Kolhe ja.tigust.i ho~ menak'koa. Eken bar hajar ira.l sae pongel pe (2843) got.en kolhe Ban'gladisom reko basok'kana. Chapainawabgonj ar Rajshahi jilare ba.r.ti Kolhe doko basok'kana. Ona chad.a Natore ar Dinajpur jila reho~ menak'koa.

Sedae oktere Kolhe do a.d.i haron kost.oreko tahe~kana. Ente ja.sti kolhe koak' jahan cas jumi ban' tahe~kan takoa. Ar ka.mi ho~ ban' tahe~kan takoa ar ga.i- d.an'gra ho~ kom ko a.sulet'ko kan tahe~kana. Orak' dua.r ho~ mit'tec' kate tahe~kan takoa. Judi per.ako hec'len khan gitic' la.git' a.d.i et.ket.o~r.e~c' reko tahe~nkan tahe~kana.

Menkhan nitok' kolhe koak' jion re aema pherao do n'elok' kana. Nitok' do sedae leka haron kost.ore do ba.nuk'koa. Nitok' onko do aema lekan

ka.mire jopor.ao menak'koa. Ar joto gharon'jge ga.i-d.an'gra ko asulet'koa.

Kolhe herel hopon do bir sendra a.d.i ko kusiak'a. Ja.sti kolhege bir ar.e re taken ko kusiak'a. Jate algate bir-janwar ko sendra n'am dareako. Onko do hoe-dak' hoelen khan sendra ko ond.okok'a. Hoe dak'te bir janwarak' hor.mo lohodok'a ar dak' thir lenkhan seton'reko tasek'a ar un okterege kolhe herel hoponak' bir janwar sendra n'am do a.d.i alga hoyok'takoa.

Abo santal leka kolheak' ho~ pa.ris menak'takoa. Pa.ris do dak'ko metak'a. Ado onko do abo leka 12 pa.ris do ba.nuk'takoa. Onko do Soren, Tudu, Murmu, Mardi Hansda ar Saicuriko beohara.

A.d.i laha okte re kolhe koak' nij pa.rsite seren' do ba.nuk'takoa. Kolhe do ror.ako nij kolhe pa.rsite ar Ban'gla pa.rsitekoteko seren' baraet'kan tahe~kana. Menkhan nitok' akoak' nij pa.rsite seren' arko enec' dareak' kana. Kolhe do jhumur, jhumta (ban'gla) ar sunum sasan' ko seren' dareak'a. Kolhe do bapla, atore onust.han hoelen khan a.d.i ko ra.ska.k'a. Nahak' oktere ako nij pa.rsite seren' ko teareda. Noko do baplakore nonkanak' jhumur seren' ko seren'a , jemon

" Rohonpur ha.t.ia. kana

Somar hilok' lagok' kana

Kagulite a.cur hic'nam maran' hili

Cikate n'am kedam pan khili

Dada ho~ banuea hili

Inho~ banuea am maran hili"

Kolhe do got.a bochor re barea maran' porob jakjomok'teko manaoa. Ona porob do hoyok' kana Loban ar Sakrat (pusna). Un oktere per.ako ne~ota koa ar ako ho~ per.a sec' khon ne~ota ko n'am lekhan ko calak'a.

Kolheren do or.ak' bon'ga ko tahe~kana. Ar nokowak' nutum do hoyok'kana, Marpha bon'ga, sirkam ar Bhairo Bon'ga. Noko Bon'ga do

or.ak' Bon'gako metako kana. Kolhewak' biswas do noage onko or.ak' Bon'ga ko tahe~len khan ako or.ak'ren joto admi mon'jko tahe~na ar joto lekan baric' khon rukhia ko n'ama. Or.ak' bon'ga kusi ocoko la.git' puja ja.rur.a. Un oktere gharon'jren umerte laha akan latu admi puja ka.mie pura.ua. Ar rua hasoreko par.aolen khan mon'jok' la.git' Sirkam Bhairo ko puja.wakoa. Puja la.git' or.ak' bon'ga bakhra hende kha.si ar or.ak'/bahre la.git' pond kha.si emok' hoyok'takoa. Ar ja~ha~e bae besok' khan Janguru t.hen ko senok'a.

Per.ako hec'len khan ko atan' daram koa. Un re ona gharon'j re a.d.i ra.ska hoyok'a ar mon'j jom-n'u~ ko teara. Per.a bida oktere joto hor son'gete dobok' johar kate bida ko emakoa.

Okte parom calak' son'ge son'gete Jotowak' do pheraok' kana. Aboak' disom, et.ak' et.ak' ja.tko akoak' somaj lahanti la.git', gharon'j lahanti la.git' laha sec'ko dar.eda. Menkhan Kolhewak' jionre maran' pherao do ban' n'elok' kana. Nit' ho~ et.ak' ja.t'ko n'el leko khan danan'reko tahe~na. Ar nonkage Kolheak' jion do dare umul leka parom calak' kantakoa.

2005 sal re Babudang atore pa.hil Sonaton Soren ak' poribar Jisukin atan' kedea ar ba.ptismakin hataokeda ar ona son'ge arho~ 3 gharon'j khon 18 admi Jisu Ma.si baban'caoic' menteko atan' kedea ar ba.ptismako atan'keda. Ar un khonge Babudang ato do BNELC reak' mand.er hisa.bte lekheyena. Jaoge noko 18 got.en admi girja.k'ako ar onkoak' jion re Isorak' a.sirbad ko n'amkeda. Ona ia.te onkowak' bhage ka.mi helmel n'elte ar bhage sombad an'jomte atoren aema hor do Probhu Ma.siko atan' kedea. Nitok' Babudang mand.er ren boeha miserako jao Robibar Isor sarhae la.git' dewa-sewareko seledok' kana. Nit d.her hor.ge Robibar hilok' ka.mi do bako senok'a.

Nitok' rua hasoreko par.aolen khan besok' la.git' bon'ga buru bako puja.wakoa ar ujha guru t.hen ho~ bako calak'a. Rua haso reko parao lenkhan besok' la.git' Isor t.henko koejon'a ar daktar t.hen ko senok' kana.

2014 sal Josodha Tudu ar 2018 salre Canu Hasda n'inda n'uhum oktere bin' ko hambur.let'kina. Unkinak' pa.tia.u tahe~kana koejon' lekhan

unkin dokin besok'a. Unkin besok' lagit' Pastor, maejiu poporcaric' ar mand,er ren sanam admiko Isor t,hen ko koe akat'a. Ar sa,rige Isor do onkowak' neho~r koejon'e an'jom akada ar unkin admi dokin boge akana.

Lahate Babudang atore olok' par,hao bad,ae hor, bako tahe~kana. Menkhan nitok' aema gidra, do par,hao ko hamet, akada. Isorak' a,sirbad chad,a kolhe admiak' pherao do ban hoekok'a. Nitok' do Girja ghonta ru lekhan olok' par,hao bad,ae admiko do Baebel ar seren puthiwante girja, hijuk' jao geko n'el namok' kana. Maejiu poporcaric' Rumali Hasda Isorak' dayate bhage sombad porcar la,git'e ka,mikana ar ona son'gete Isorak' a,sirbadte apnar jion jingi napaete lahanti la,git' mit' katic' dokan ho~e khula,u akat'a.

Ar ona mand,er re sedae khon n'u~ bulok'a jinis ko khon d,her ko pherao akana. Sarige Isore kusi lenkhan jotowak'ge hoyok'a. Tehen' Babudang mand,er re Isorak' a,sirbad menak''te aema pherao do n'el n'amok' kana. Nia, pherao ar ho~ hoe idik'a jaoge bha,la,i la,git'.

Mit't_en Kur,i In' Dula_r,kedea-Gel Ak' Porbo

Dula_r,ia. Boeha,

Amak' ses cit,hire okam ola,din', in' la,git' do ekalte nawa katha kana. Noa do in'ak' monere tisge ban' boloadin'a je okoe kur,i ac'geye ne~otakeden'ten' jot,et'kede uniyin' ba,r,ic'kedea. In' ma jaogen' hudisan je onate don' kusi ocokedea. Noa reak' mit' bar gateko tuluc' ho~n' galmarao bar,a akada. Menkhan onko doko meneda je okoe kur,i ona reak' hewa menak'tako, mit' lekama, menkeako "ko berbad cuka,uge", ar kharap gid,ikako reak' ja~ha~n sawalge ba,nuk', onkanko tuluc' cet'jon' do alae koragea, boron' subita ho~ menak'a. Bad,ae sanakin'a, noa sawal selet' amak' do cet' hudis menak'a? Mit't,ec' in'ak' kukli

reak'ror. rua.r. do a.urim ema.n'a, onko ayo okoe gidra. bako janam dar.eako reak'. Bapla lahare kha.t.ite bad.ae mar.an' je mit't.en ayo do gidra.i janam dar.eakoa seye ba.n'jhigea, ja.rur.a se ban', jemon tayomte gidra.i janam dar.eako dosar ba.hu hataojon' bid.a.ure alo bok'lo. Cedak' je oka baplate gidra. bako hoyok' onare ja~ha~n manege ba.nuk'a.

Ma tobe tehen' do ina.k'gelan' galmaraoa. Nond.egen' muca.t'et' kana, mon'j ar napaege bar.e tahe~nme.

Noage,

Boeha reak' dula.r. johar selet'

Gatetam

Nurse Ar Nursing Babot Thor_a Katha

A.d.i sedae reak' katha, tin okte nurse babotre hor.ak' ba.r.ic'' hudis cinta. tahe~kan. Nurse ko do ba.r.ic' non'jorteko n'elet'ko tahe~kante tis ho~ okoe hor. ho~ nurse ka.mi do bako he~k' ak' kan tahe~kana. Menkhan ona okte mit' hor.e tahe~kana, okoe do nurse ka.mi a.d.i a~t.e manot are dula.r.et' tahe~kan. Uni do nurse ko la.git' ho~e hudisok'kan tahe~kana ar aema lekan ka.mi talate hor.ko saman're ten'gonkan tahe~kana. Nit joto hor.ak' monre noa kukuli hec' botec'kok'a je, okoe kanae uni hor. do? In' do uni namd.ak' metak'me bha.gan maejiu ak' kathan' meneda, okoe do ac'ak' gidra. umer khonge hor.koe jotonet'ko tahe~kan.

Florance Nightingale n'utuman mit' maejiu ak' katha do pasec' amdaj joto hor. lekagebon bad.aea. Uni do ac'ak' gidra. umer khon ehop'kate

got.a jion bhor hor.ko seba joton talate khemao akada. Uniak' onkan ka.mi n'utumte a.d.i manot ar johar n'am lek kangeae. 1854 sermare Crimian la.r.ha.ire akhamlen birbant.ako jotonko talate ac'ak' oko dula.r. doe sodor akada. Ona jokhen una.k' kar.an' kuca.n' n'ut্রে harkin marsalte joto hor.ak' or.ak' hiri senok'kan tahe~kana are jotonet'ko tahe~kana. Ona ia.te uniak' janam din disa. rua.r. ar manot la.git'ge jao serma reak' 12 May do Nursing ma~ha~ manotok' kana.

Onate Florance Nightingale do ***“Lady with the Lamp”*** ko metaekana. Abo okoe do nurse ka.mire jopor.ao menak'bon onko joto ko la.git' tahe~nkana aema aema manot ar dula.r. johar. Okoe do nurse ka.mibon bachaojon' kan se da.yik bon gok'et'kan, jemon abon ho~ uni lekabon benao rakap' dar.eak'. Aboak' got.a jion hor.ko jogao joton ar sebare jamar. akanbon tahe~n ma. Sanam lekan rua.k'kan hor.ko bogeko talatege abo ho~ aboak' jionrebon jitkar dar.eak'a. Bohok're noa katha rebet' dohoe hoyok'a je, Nursing reak' bhedge kana hor. jotonko. Nonka katha menak'a, ***“Nursing is an Art and Science”***.

Janam Disom

Janam disom Ban'gladisom

A.d.i sohag dula.r. reak' janam disom,

A.d.i leka ja.ti menak'bon

A.d.i leka a.ri-ca.li tabon.

Perec' akat'bon disom god.ako

Juda. getabon horok' bande ko,

Juda. getabon jomak' n'u~ ak'

Enho~ janam disomre mit'ge menak'bon.

Nana huna.r ce~r.e~ raha

Nana huna.r baha jok',

Setak' sin'ga.r. andor.akan sarhao akan do.

Jo bahate perec' akan,

Tina.k' sebel sor.om

Bir gajar. dare na.r.i~te sajabo akan,

Mon'jge Janam disom.

Hisi Ce~r.e~

Hisi ce~r.e~ amge napae

Tahe~nam okare?

Hila.k' kantam amak' or.ak',

Tale dare re.

Bakjunu a.gukatek'

Tuka.m marsaleda,

Nuna.k' cehera tuka. benao do

Okarem cet' leda?

Hud.ur bijli dak' ja.put'

Tuka. khonem uyun',

Bele akan god.a hor.o

A.guam luyun' luyun'.

Aleak' or.ak' kumba.

Otre menak'tale,

Bhador bon'ga hoe dak'te

Pasec' ra.udok' tale.

Rotary Eid Sandes Ko Emkeda Amnura Re

At.hwar hilok' (07 April 2024) setak' 11 baja okte Chapainawabgonj sodor upajila reak' Amnura re Eid-Ul-Fitr n'utumte pongel (40) got.en muslim gidra. Eid sandes ko n'amkeda. Rotary Club of Dhaka Kawran Bazar ar NAGR (National Agency for Green Revolution) ak' bondoboste noa Eid sandes do em ha.t.in'ena. Sandes lekate emena, 1 peket. lacha semai, 1 kg cini, Budia 1 peket., Soamin sunum 1 lit.er, Polao caole 1 kg, jel mosola, 1 kg kha.ja.r.i, ar Noodles 1 peket..

Eid sandes em ha.t.in' akhr. are set. ere tahe~kana, Rotary Community Corps Amnura ren upadesta ar National Agency for Green Revolution ren maran' a.yuric' Mn.Stephen Soren, RCC-Amnura ren sabha mukhia. Prodip Hembrom, Secretary Promila Hasdak, Amnura Adarsho Girls High School ren Headmaster Md.Kudrat-e-Khuda, Tabitha Kindergarten School ren Mahasoe Nilufa Parvin, Ar Amnura Mission Primary School ren Mahasoe Sathi Akter.

Akhr. are pa.hilte Rotary Club Of Dhaka Kawran Bazar ar NAGR (National Agency for Green Revolution) songstha sec' khon Eid n'utumte johare emat'koa Mn.Stephen Soren. Uni doe la.i sodorkeda, Eid reak' ra.ska. ha.pa.t.in' la.git'ge Rotary Club Of Dhaka Kawran Bazar, National Agency for Green Revolution ar RCC do noa akhr. ae bonsobos akada.

N'elok'te nase reho~ enho~ aleak' noa emen dula.r. sandeste noko gidra.ko akoak' gharon'jren ko sa~o mon'j ar napaete Eid Porob reko ra.ska. dar.eak'a. Aleak' noa songstha do noa t.ot.hare sikhna.t, niropon hor.mo, sa~ota ceton, Gidra. umere bapla ar n'u bubulak' babot ten'go daramre ar sa~otare mimit' ka.mihora ko lahantire ka.mikana, Ar Rotary Club Of Dhaka Kawran Bazar ar RCC ho~ mit' ga~otate maejiuko lahantire ar Ka.ud.i ko sec'te lahanti, niripon hor.mo babot ceton tahe~n nonkanak' doe ka.mi kana. As menak'a sanam hor.ko darakan se set.er hijuk'kan Eid porob mon'j ar ra.ska. salak'ko khemao ma.